

Dikgatiso Tse di Dirisiwang mo *Bukaneng ya Botshelo le Bodiredi*

JULY 6-12

MATLOTLO A A MO LEFOKONG LA MODIMO | EKESODO 6-7

“Jaanong o Tla Bona se ke Tla se Dirang Faro”

(Ekesodo 6:1) Ka jalo Jehofa a raya Moshe a re: “Jaanong o tla bona se ke tla se dirang Faro, ka gonne o tla ba lesa ba tsamaya ka ntlha ya seatla se se nonofileng e bile o tla ba leleka mo lefatsheng la gagwe ka ntlha ya seatla se se nonofileng.”

(Ekesodo 6:6, 7) “Ka jalo raya bomorwa Iseraele o re, ‘Ke nna Jehofa, mme ke tla lo ntsha kafa tlase ga mekgweleo ya Baegepeto ke bo ke lo golola mo bokgobeng jwa bone, ke tla lo namola ka lebogo le le otlototsweng le ka dikatlholo tse dikgolo. ⁷ Ke tla lo tseela kwa go nna jaaka setšhaba, mme ke tla itshupa ke le Modimo mo go lona; mme lo tla itse gore ke nna Jehofa Modimo wa lona yo o lo ntshang kafa tlase ga mekgweleo ya Egepeto.

it-2-E 436 ¶13

Moshe

Baiseraele le bone ba ile ba fetoga. Baiseraele ba ile ba amogela Moshe, mme e re ka ba ne ba le mo tlase ga taolo ya ga Faro e bile ba dira mo maemong a a thata, ba ile ba simolola go ngongorega ka Moshe mme seo se ile sa dira gore Moshe a kope thuso kwa go Jehofa. (Ek 4:29-31; 5:19-23) Ka nako eo Mogodimodimo o ile a notsha Moshe ka go ba bolelela se Aborahame, Isake le Jakobe ba neng ba batla go se itse, gore leina Jehofa le kaya eng mo go gololeng Baiseraele kwa Egepeto le go ba tlhoma go nna lefatsheng le setšhaba se segolo mo lefatsheng le a ba solofeditseng lone. (Ek 6:1-8) Le fa Baiseraele ba utlwile dilo tseno ba ile ba palelwa ke go reetsa Moshe. Morago ga petso ya borobongwe, Baiseraele ba ile ba simolola go reetsa Moshe, mme

morago ga petso ya bolesome Moshe o ile a kgo-na go ba etelela pele go tswa mo lefatsheng la Egepeto, “ba tlhomagane kafa thulaganyong ya tlabano.”—Ek 13:18.

(Ekesodo 7:4, 5) Mme Faro ga a kitla a lo reetsa; mme ke tla tshwanelwa ke go baya Egepeto seatla ke bo ke ntsha masomosomo a me, batho ba me, bomorwa Iseraele, mo lefatsheng la Egepeto ka dikatlholo tse dikgolo. ⁵ Mme Baegepeto ba tla itse gore ke nna Jehofa fa ke otlotolela Egepeto seatla sa me, mme ruri ke tla ntsha bomorwa Iseraele mo gare ga bone.”

it-2-E 436 ¶1-2

Moshe

Fa Pele ga Faro wa Egepeto. Moshe le Arone ba ne dira karolo ya botlhokwa mo dintweng tsa medimo. Faro o ile a bitsa maatla a medimo yotlhe ya Egepeto kgatlhanong le maatla a ga Jehofa a dirisa balaodi ba ba bidiwang Janese le Jambere-se jaaka baperesiti ba ba dirang boselamose. (2Ti 3:8) Kgakgamatso ya ntlha e Arone a neng a e dira fa pele ga Faro a kaelwa ke Moshe e ne e bontsha gore Jehofa o na le maatla a a gaisang maatla a medimo yotlhe ya Egepeto, mme le fa go ntse jalo, Faro o ile a nna kgopo le go feta. (Ek 7:8-13) Morago ga petso ya boraro, baperesiti ba ga Faro ba ile ba simolola go amogela gore se, “Ke monwana wa Modimo!” Baperesiti ba ga Faro ba ile ba palelwa ke go ema fa pele ga gagwe gore ba lwe le Moshe ka ntlha ya ditlhagala tse ba neng ba na le tsone.—Ek 8:16-19; 9:10-12.

Dipetso tseno di ile tsa dira gore bangwe ba nne kutlo mme ba bangwe nne tlhogoethata.

Moshe le Arone ke bone ba neng ba bega Dipetso Tse di Lesome. Dipetso tseno di ile tsa direga fela jalo mme seno se ne se bontsha gore Moshe ke moemedi wa ga Jehofa. Batho ba ile ba itse gore leina la Modimo ke Jehofa mme ba ile ba simolola go bua ka lone kwa Egepeto—seno se ile

sa dira gore Baiseraele ba nne kutlo le Baegepeto ba bangwe mme Faro, bagakolodi ba gagwe le ba ba neng ba mo ema nokeng ba ile ba nna tlhogoethata. (Ek 9:16; 11:10; 12:29-39) Go na le gore ba dumele gore ba diretse medimo ya bone phoso, ba ne ba *itse* gore Jehofa Modimo ke ene a atlholang medimo ya bone. Morago ga petso ya borobongwe, Moshe “o ne a le mogolo thata mo lefatsheng la Egepeto, mo matlhong a batlhanka ba ga Faro le mo matlhong a batho.”—Ek 11:3.

Go Ribolola Matlotlo mo Dikwalong

(Ekesodo 6:3) Mme ke ne ke tle ke bonale kwa go Aborahame, Isake le Jakobe ke le Modimo Mothatayotlhe, mme ka ga leina la me Jehofa ga ke a ka ka ba ikitsise.

it-1-E 78 ¶3-4 Mothatayotlhe

Jehofa o ne a dirisa sereto sa “Modimo Mothatayotlhe” (*’El Shad-dai’*) fa a ne a solofetsa Aborahame ka go tsholwa ga ga Isake mme tsholofetso eno e ne e tlhoka gore Aborahame a dumele gore Jehofa a ka kgona go e diragatsa ka maatla a gagwe. Sereto seno se ne sa dirisiwa fa go ne gotwe Jehofa o tla segofatsa Isake le Jakobe go nna baruaboswa ba kgolagano ya ga Aborahame.—Ge 17:1; 28:3; 35:11; 48:3.

Go dumalana le seno, Jehofa o ne a raya Moshe a re: “Ke ne ke tle ke bonale kwa go Aborahame, Isake le Jakobe ke le Modimo Mothatayotlhe [*be’El’ Shad-dai’*], mme ka ga leina la me Jehofa ga ke a ka ka ba ikitsise.” (Ek 6:3) Seno ga se reye gore ba ne ba sa itse leina la Modimo e leng Jehofa e re ka ba ne ba le dirisa mo nakong e e fetileng. (Ge 4:1; 26; 14:22; 27:27; 28:16) Fa buka ya Genesise e bua ka botshelo jwa ditlhogo tsa lotso, e umaka lefoko “Mothatayotlhe” makgetlo a ka nna 6. Mme mo Dikwalong tsa Sehebera leina Jehofa le tlhagelela makgetlo a ka nna 172. Mme le fa ditlhogo tsa lotso di ne di anaannela gore “Modimo ke Mothatayotlhe” ga ba ka ba nna le tshono ya go anaannela bokao jwa leina Jehofa. Buka ya *The Illustrated Bible Dictionary*

(Bol. 1, ts. 572) e a re: “Fa ditlhogo tsa lotso di ne di bolelelwa dilo tse di neng di tla diragala mo isagweng; ba ne ba tshwanetse go nna le tumelo ya gore Yahweh kgotsa Modimo (*’el*), o ne a tlele go dira dilo tse a neng a ba solofeditse tsone. Tsenolo ya go nageng e tlhalositse tsela e Modimo a le maatla ka yone le go nna gone ga gagwe a dirisa leina Yahweh.”—E tlhabolotswe ke J. D. Douglas, 1980.

(Ekesodo 7:1) Ka gone Jehofa a raya Moshe a re: “Bona, ke go dirile Modimo mo go Faro, mme Arone morwarrago o tla nna moporofeti wa gago.

it-2-E 435 ¶15 Moshe

Moshe ga a ka a tlogela go dirisiwa ka gone o ne a ipelaela. Moshe o ne a bontsha gore wa ipelaela fa a ne a re ga se seleta mo puong. Fano Moshe o ne a fetogile, o ne a sa tshwane le tsele e a neng a tshwana ka yone dingwaga tse 40 tse di fetileng. O ile a tswelela a bua le Jehofa a bo a kopa gore a mo itshwarele ka gone o ne a ka se kgone go dira kabelo e Modimo a neng a mo neile yone. Le fa Jehofa a ne a galefile ga a ka a tlogela go dirisa Moshe go na le moo, o ne a dirisa Arone go nna mmueledi wa ga Moshe. E re ka Moshe e ne e le mmueledi wa ga Jehofa, o ne a nna “Modimo” mo go Arone, yo e neng e le mmueledi wa ga Moshe. Jehofa o ne a bolelela Moshe ditaelo mme Moshe a bo a di bolelela Arone, Arone a bo a di bolelela banna ba bagolo kwa Iseraele le Faro (Faro yono ke motlhatlhami wa ga Faro yo Moshe a neng a tshabile kwa go ene dingwaga tse 40 tse di fetileng). (Ek 2:23; 4:10-17) Moragonyana Jehofa o ne a re Arone ke “moporofeti” wa ga Moshe, mo go rayang gore Moshe e ne e le moporofeti wa Modimo, yo Modimo a neng a mo kaela gore a bue a reng mme Moshe ene o ne a laela Arone gore a bue a reng. Moshe o ne a bolelelwa gore o diriwa “Modimo mo go Faro,” mo go rayang gore o ne a newa maatla le baloadi jo bo fetang jwa ga Faro gore a se ka a boifa kgosi eno ya Egepeto.—Ek 7:1, 2.

Mmalo wa Baebele

(Ekesodo 6:1-15) Ka jalo Jehofa a raya Moshe a re: “Jaanong o tla bona se ke tla se dirang Faro, ka gonne o tla ba lesa ba tsamaya ka ntlha ya seatla se se nonofileng e bile o tla ba leleka mo lefatsheng la gagwe ka ntlha ya seatla se se nonofileng.” ² Mme Modimo a tswelela go bua le Moshe a mo raya a re: “Ke nna Jehofa. ³ Mme ke ne ke tle ke bonale kwa go Aborahame, Isake le Jakobe ke le Modimo Mothatayotlhe, mme ka ga leina la me Jehofa ga ke a ka ka ba ikitsise. ⁴ Mme gape, ke ne ka tlhomamisa kgolagano ya me le bone ya go ba naya lefatshe la Kanaana, lefatshe la boagi jwa bone jwa boeng le ba neng ba nna mo go lone e le baeng. ⁵ Mme nna, e leng nna, ke utlwile go fegelwa ga bomorwa Iseraele, ba Baegepeto ba ba dirang makgoba, mme ke gakologelwa kgolagano ya me. ⁶ “Ka jalo raya bomorwa Iseraele o re, ‘Ke nna Jehofa, mme ke tla lo ntsha kafa tlase ga mekgweleo ya Baegepeto ke bo ke lo golola mo bokgobeng jwa bone, ke tla lo namola ka lebogo le le otlotsweng le ka dikatloho tse dikgolo. ⁷ Ke tla lo tseela kwa go nna jaaka setšhaba, mme ke tla itshupa ke le Modimo mo go lona; mme lo tla itse gore ke nna Jehofa Modimo wa lona yo o lo ntshang kafa tlase ga mekgweleo ya Egepeto. ⁸ Mme ke tla lo tliša mo lefatsheng le ke neng ka tsholetsa seatla sa me ka ikano gore ke tla le naya Aborahame, Isake le Jakobe; mme ke tla le naya lona go nna sengwe se lo tla se ruang. Ke nna Jehofa.’” ⁹ Morago ga moo Moshe a bua le bomorwa Iseraele ka tsela eno, mme ga ba a ka ba reetsa Moshe ka ntlha ya go kgobega marapo le ka ntlha ya bokgoba jo bo thata. ¹⁰ Foo Jehofa a bua le Moshe, a re: ¹¹ “Tsena o bue le Faro, kgosi ya Egepeto, gore a lese bomorwa Iseraele ba tsamaye ba tswe mo lefatsheng la gagwe.” ¹² Le fa go ntse jalo, Moshe a bua fa pele ga ga Jehofa, a re:

“Bona! Bomorwa Iseraele ga ba a ntheetsa; mme tota Faro o tla ntheetsa jang, e re ka ke le dipounama di sa rupang?” ¹³ Mme Jehofa a tswelela a bua le Moshe le Arone a bo a ntsha taolo ka bone e e yang kwa go bomorwa Iseraele le kwa go Faro, kgosi ya Egepeto, gore a ntshe bomorwa Iseraele mo lefatsheng la Egepeto. ¹⁴ Bano ke ditlhogo tsa ntlo ya borraabone: Bomorwa Rubene, leitibolo la ga Iseraele, e ne e le Hanoke le Palu, Hesarone le Karami. Ano ke malapa a ga Rubene. ¹⁵ Mme bomorwa Simeone e ne e le Jemuele le Jamine le Ohade le Jakine le Sohare le Shaulo morwa mosadi wa Mokanana. Ano ke malapa a ga Simeone.

JULY 13-19

MATLOTLO A A MO LEFOKONG LA MODIMO | EKESODO 8-9

**“Fa Faro a Ikgantsha O ne A sa Lemoge
Gore o Diragatsa Maikaelelo a Modimo”**

(Ekesodo 8:15) E rile Faro a bona gore kgololo e ne e diragetse, a dira pelo ya gagwe logwadi; mme a se ka a ba reetsa, fela jaaka Jehofa a ne a buile.

it-2-E 1040-1041

Bodipa

Jehofa o ile a letlelela batho ka bopelotelele gore ba tswelele ba ntse ba tshela le fa ba ne ba tshwanelwa ke go swa. (Ge 15:16; 2Pe 3:9) Mme ba ba ileng ba tlhopha go reetsa ditaelo tsa gagwe Jehofa o ile a ba utlwela botlhoko (Jos 2:8-14; 6:22, 23; 9:3-15), mme ka maswabi ba bangwe ba ile ba tlhopha go nna tlhogoethata ba bo ba nna kgatlhanong le Jehofa le batho ba gagwe. (Dut 2:30-33; Jos 11:19, 20) E re ka Jehofa a sa thibele ope go nna bodipa, Baebele e a re ‘o lesa yo o batlang go nna thamoethata’ kgotsa ‘o letla gore pelo ya gagwe e thatafale.’ Mme fa Modimo a ipusolosetsa kgatlhanong le batho ba ba bodipa seno se tla bontsha maatla

e bile seno se tla dira gore leina la gagwe le galediwe.—Bapisa le Ek 4:21; Joh 12:40; Bar 9:14-18.

(Ekesodo 8:18, 19) Mme baperesiti ba ba dirang maselamose ba leka go dira se se tshwanang ka bokgoni jwa bone jwa sephiri, gore ba tle ba tlise mentsana, mme ba ne ba sa kgone. Mme mentsana ya nna mo bathong le mo diphologolong. ¹⁹ Ka gone baperesiti ba ba dirang maselamose ba raya Faro ba re: “Ke monwana wa Modimo!” Mme pelo ya ga Faro ya tswelala go thatafala, mme a se ka a ba reetsa, fela jaaka Jehofa a ne a buile.

(Ekesodo 9:15-17) Gonne gone jaanong ke ka bo ke ntshitse seatla sa me gore ke go iteye wena le batho ba gago ka bolwetse jwa leroborobo gore o nyelediwe mo lefatsheng. ¹⁶ Mme tota, ke go tlogetse o ntse o le gone ka lebaka leno, gore ke go bontshe maatla a me le gore leina la me le bolelwe mo lefatsheng lotlhe. ¹⁷ A o sa ntse o itshwere ka mabela kгатhanong le batho ba me ka go sa ba lese ba tsamaya?

it-2-E 1181 ¶3-5

Bosula

Jehofa o kgona go dirisa batho ba ba bosula go diragatsa maikaelelo a gagwe ba sa lemoge. Le fa batho bano ba le kгатhanong le Modimo, Modimo o kgona go sireletsa batho ba gagwe gore ba se ka ba tlhagisetswa kotsi ke batho ba ba leng kгатhonong le ene e bile o kgona go dira gore tshiamo ya gagwe e bonale ka ditiro tsa batho bano. (Bar 3:3-5, 23-26; 8:35-39; Pes 76:10) Kgang eno e tlhalosiwa sentle mo go Diane 16:4 e e reng: “Jehofa o diretse sengwe le sengwe boikaelelo jwa gagwe, ee, le moikepi letsatsi le le bosula.”

Kgang e e tshwanang le eno ke ya ga Faro, fa Jehofa a ne a rometse Moshe le Arone kwa go Faro gore a golole Baiseraele kwa Egepeto. Jehofa ga se ene a dirileng gore Faro a nne bosula mme gone o ile a mo letlelela gore a tswelale a ntse a

tshela, a bo a ipontsha gore ke motho yo o bosula le gore o tshwanelwa ke loso. Lebaka la go Jehofa a ile a tlogela Faro a ntse a tshela le tlhalosiwa mo go Ekesodo 9:16 fa e re: “Mme tota, ke go tlogetse o ntse o le gone ka lebaka leno, gore ke go bontshe maatla a me le gore leina la me le bolelwe mo lefatsheng lotlhe.”

Dipetso Tse di Lesome tse Jehofa a ileng a di tli-setsa Baegepeto le go bolawa ga Faro le masole a gagwe kwa Lewatleng le Lehibidu di bontsha maatla a ga Jehofa. (Ek 7:14–12:30; Pes 78:43-51; 136:15) Mme morago ga dingwaga di le dintsi batho ba ne ba sa ntse ba bua ka kang eno e bile leina la Modimo le ile la itsiwe mo lefatsheng lotlhe. (Jos 2:10, 11; 1Sa 4:8) Fa Jehofa a ka bo a bolaile Faro ka yone nako eo, batho ba ka bo sa itse gore o na le maatla a a gaisang a ga Faro e bile a ka bo a sa kgona go golola Baiseraele.

Go Ribolola Matlotlo mo Dikwalong

(Ekesodo 8:21) Mme fa o sa lese batho ba me ba tsamaya, bona, ke romela diboba mo go wena le mo batlhankeng ba gago le mo bathong ba gago le mo teng ga matlo a gago; mme matlo a Egepeto a tla tlala diboba fela thata, le mmu o a leng mo go one.

it-1-E 878

Seboba

Ga go itsiwe gore go ne go buiwa ka tshenekegi efe e e tlhagelelang mo Dikwalong tsa Sehebera e Jehofa a neng a e tlietsa Baegepeto ka petso ya bonê mme se re se itseng ke gore fa ditshenekegi tseno di ne di tlhalesela batho kwa Egepeto ga di a ka tsa tlhasela Baiseraele kwa Goshene. (Ek 8:21, 22, 24, 29, 31; Pes 78:45; 105:31) Gantsi lefoko leno ‘A-rov’ le dirisiwa go tlhalosa “seboba” (JB, NW, Ro), “khukhwane” (Yg), “dintshi” (AS, KJ, RS), “mentsana” (AT), le “dintshi tse di lomang” (LXX).

Mo Seesemaneng lefoko “seboba” le akaretsa mefuta yotlhe ya diboba le mefuta yotlhe ya matsetse. Seboba se se tshegadi se kgona go phunya nama ya diphologolo le tsa batho gore se

tle se monye madi. Mme matsetse one a nna mo mmeleng wa diphologolo le mo mebeleng ya batho ba ba nnang kwa bobotsatsi. Ka jalo dipetso tsa diboba di ile tsa dira gore batho ba kwa Egepeto ba boge gammogo le leruo la bone mme diphologolo dingwe tsa bone di ile tsa swa.

(Ekesodo 8:25-27) Labofelo Faro a bitsa Moshe le Arone mme a re: “Tsamayang, lo ntshetse Modimo wa lona setlhabelo mo lefatsheng leno.” ²⁶ Mme Moshe a re: “Ga go letlelesege gore re dire jalo, ka gonne re ne re tla ntshetsa Jehofa Modimo wa rona setlhabelo sa selo se se makgapha mo Baegepetong. A re tseye gore re ne re tla ntsha selo se se makgapha setlhabelo mo Baegepetong fa pele ga matlho a bone; a ba ne ba se kitla ba re kgobotletsa?” ²⁷ Re tla tsamaya loeto lwa malatsi a le mararo re ya kwa n-geng mme ruri re tla ntshetsa Jehofa Modimo wa rona setlhabelo fela jaaka a re boletse.”

w04 3/15 25 ¶9

Dintlhakgolo Tsa Buka ya Ekesodo

8:26, 27—Ke ka ntlha yang fa Moshe a ne a re ditlhabelo tse Baiseraele ba neng ba tla di ntsha e ne e tla nna “selo se se makgapha mo Baegepetong”? Go ne go obamelwa diphologolo di le dintsi tse di farologaneng kwa Egepeto. Ka gone go umaka ditlhabelo go ne go gatelela lebaka la go bo Moshe a ne a batla gore Baiseraele ba letlelelwe go tsamaya go ya go ntshetsa Jehofa ditlhabelo.

Mmalo wa Baebele

(Ekesodo 8:1-19) Foo Jehofa a raya Moshe a re: “Tsena kwa go Faro, mme o mo reye o re, ‘Jehofa o buile jaana: “Lesa batho ba me ba tsamaye gore ba tle ba ntirele.” ² Mme fa o nna o gana go ba lesa ba tsamaya, bona, ke lere sebetso sa digogwane mo karolong yotlhe ya naga ya gago. ³ Mme Noka ya Nile e tla nyeuma digogwane fela thata, mme di tla tla di bo di tsena mo teng ga ntlo ya gago le

mo phaposing ya gago e e kwa teng ya borobalo le mo sekanamelong sa gago le mo teng ga matlo a batlhanka ba gago le mo bathong ba gago le mo teng ga dipesetso tsa gago le mo teng ga megopo ya gago ya go dubela. ⁴ Mme digogwane di tla tla mo go wena le mo bathong ba gago le mo batlhankeng botlhe ba gago.”” ⁵ Moragonyana Jehofa a raya Moshe a re: “Raya Arone o re, ‘Otlololela seatla sa gago ka thobane ya gago mo godimo ga dinoka, mesele ya Nile le megobe e e tletseng lotlhaka mme o dire gore digogwane di tlhatlogele mo lefatsheng la Egepeto.’” ⁶ Foo Arone a otlololela seatla sa gagwe mo godimo ga metsi a Egepeto, mme digogwane tsa simolola go tlhatloga mme tsa bipa lefatshe la Egepeto. ⁷ Le fa go ntse jalo, bapere-siti ba ba dirang maselamose ba dira se se tshwanang ka bokgoni jwa bone jwa sephiri mme ba dira gore digogwane di tlhatlogele mo lefatsheng la Egepeto. ⁸ Fa nako e ntse e tsamaya Faro a bitsa Moshe le Arone mme a re: “Rapelang Jehofa gore a tlose digogwane mo go nna le mo bathong ba me, e re ka ke batla go lesa batho ba tsamaye gore ba tle ba ntshetse Jehofa setlhabelo.” ⁹ Foo Moshe a raya Faro a re: “Ke go tlogelela kgalalelo ya go mpolelela gore ke go rapelele leng wena le batlhanka ba gago le batho ba gago gore digogwane di fedisiwe mo go wena le mo matlong a gago. Di tla sala mo Nokeng ya Nile fela.” ¹⁰ Foo a re: “Ka moso.” Ka jalo a re: “Go tla nna kafa lefokong la gago, gore o tle o itse gore ga go ope o sele yo o tshwanang le Jehofa Modimo wa rona, ¹¹ ka gonne ruri digogwane di tla tswa mo go wena le mo matlong a gago le mo batlhankeng ba gago le mo bathong ba gago. Di tla sala mo Nokeng ya Nile fela.” ¹² Ka jalo Moshe le Arone ba tswa mo go Faro, mme Moshe a goela kwa go Jehofa ka ntlha ya digogwane tse A neng a di beile mo go Faro. ¹³ Foo Jehofa a dira kafa lefokong

la ga Moshe, mme digogwane tsa swa mo matlong, mo malwapeng le mo masimong. ¹⁴ Mme ba di koaganya, tsa nna mekoakoa, mme lefatshe la simolola go nkg a se bodu. ¹⁵ E rile Faro a bona gore kgololo e ne e diragetse, a dira pelo ya gagwe logwadi; mme a se ka a ba reetsa, fela jaaka Jehofa a ne a buile. ¹⁶ Jaanong Jehofa a raya Moshe a re: “Raya Arone o re, ‘Otlolola thobane ya gago o iteye lorole lwa lefatshe, mme lo tla nna mentsana mo lefatsheng lotlhe la Egepeto.’” ¹⁷ Mme ba dira jalo. Ka jalo Arone a otlolola seatla sa gagwe ka thobane ya gagwe mme a itaya lorole lwa lefatshe, mme mentsana ya nna mo bathong le mo diphologolong. Lorole lotlhe lwa lefatshe lwa nna mentsana mo lefatsheng lotlhe la Egepeto. ¹⁸ Mme baperesiti ba ba dirang maselamose ba leka go dira se se tshwanang ka bokgoni jwa bone jwa sephiri, gore ba tle ba tlise mentsana, mme ba ne ba sa kgone. Mme mentsana ya nna mo bathong le mo diphologolong. ¹⁹ Ka gone baperesiti ba ba dirang maselamose ba raya Faro ba re: “Ke monwana wa Modimo!” Mme pelo ya ga Faro ya tswelela go thatafala, mme a se ka a ba reetsa, fela jaaka Jehofa a ne a buile.

JULY 20-26

MATLOTLO A A MO LEFOKONG LA MODIMO | EKESODO 10-11

“Moshe le Arone Ba ne Ba le Pelokgale”

(Ekesodo 10:3-6) Ka jalo Moshe le Arone ba tsena kwa go Faro mme ba mo raya ba re: “Jehofa Modimo wa Bahebera o buile jaana, ‘O tla gana go inkobela ka lobaka lo lo kae? Lesa batho ba me ba tsamaye gore ba tle ba ntirele. ⁴ Gonne fa o nna o gana go lesa batho ba me ba tsamaya, bona, ke tlisa tsie mo teng ga melelwane ya gago ka moso. ⁵ Mme e tla bipa bogodimo jo bo bonalang jwa lefatshe mme ga go kitla go kgonega go bona lefatshe; mme e tla ja mo gongwe gotlhe mo

go falotseng, mo lo go tlogeletsweng ke sefako, ruri e tla ja setlhare sengwe le sengwe sa lona se se tlhogang e se tlosa mo nageng. ⁶ Mme matlo a gago le matlo a batlhanka ba gago botlhe le matlo a Egepeto yotlhe a tla tlala ka selekanyo se borraalona le borre ba borraalona ba iseng ba ko ba se bone go tloga ka letsatsi le ba simolotseng go nna gone ka lone mo lefatsheng go fitlha mo letsatsing leno.” Foo a retologa a tswa fa go Faro.

w09 7/15 20 ¶6

Etsa Jesu—Rera ka Bopelokgale

⁶ Gape akanya ka bopelokgale jo Moshe a neng a bo bontsha fa a ne a bua le Faro, mmusi yo o neng a sa tsewe fela a emela medimo, mme a tsewa e le modimo ka boene, morwa modimo wa letsatsi, Ra. E ka tswa e le gore ene, jaaka Bofaro ba bangwe, o ne a obamela setshwantsho sa gagwe. Se Faro a se buang e ne e le molao; o ne a busa ka molao wa tshipi. Faro yo o maatla, yo o boikgogomoso, yo o tlhogoethata o ne a sa tlwaela gore batho ba bangwe ba mmolelele gore a direng. Moshe, modisa yo o boikokobetso, o ne a tla makgetlho a mantsi kwa monneng yono—a sa lalediwa e bile a sa batliwe. Mme ke eng se Moshe a neng a bolela gore se ne se tlile go direga? Dipetso tse di bothoko. Mme o ne a batla gore go dirwe eng? O ne a batla gore boidiidi jwa batlhanka ba ga Faro ba letlelelwe go tswa mo nageng eo! A Moshe o ne a tshwanetse go nna pelokgale? Ee ruri!—Dipa. 12:3; Baheb. 11:27.

(Ekesodo 10:24-26) Morago ga moo Faro a bitsa Moshe a re: “Tsamayang lo ye go direla Jehofa. Go tla kganelwa dinku tsa lona le dikgomo tsa lona fela. Bana ba lona ba bannye le bone ba ka nna ba tsamaya le lona.” ²⁵ Mme Moshe a re: “Gape wena ka bowena o tla re naya mo diatleng tsa rona ditlhabelo le ditshupelo tse di fisiwang, e re ka re tshwanetse go di ntshetsa Jehofa Modimo wa rona. ²⁶ Mme diruiwa tsa rona le tsone di tla tsamaya le rona. Ga go kitla go letlelelwa gore tlhakwana epe e sale, ka gonne re tla tsaya

dingwe mo go tsone gore re obamele Jehofa Modimo wa rona, mme ga re itse gore re tla ntshetsa Jehofa eng mo kobamelong go fitlha re goroga gone.”

(Ekesodo 10:28) Ka jalo Faro a mo raya a re: “Tswa fa go nna! O itise! O se ka wa leka go tlhola o leba sefatlhego sa me, ka gonne ka letsatsi le o lebang sefatlhego sa me ka lone o tla swa.”

(Ekesodo 11:4-8) Mme Moshe a tswelela a re: “Jehofa o buile jaana, ‘Ke tswela kwa bogareng jwa Egepeto mo e ka nnang bosigogare, ⁵ mme leitibolo lengwe le lengwe mo lefatsheng la Egepeto le tla swa, go simolola ka leitibolo la ga Faro yo o ntseng mo setulong sa gagwe sa bogosi go fitlha ka leitibolo la lelata le le fa lelwaleng le leitibolo lengwe le lengwe la phologolo. ⁶ Mme go tla nna le selelo se segolo mo lefatsheng lotlhe la Egepeto, se go iseng go ke go nne le sepe se se tshwanang le sone, e bile go se kitla go nna le se se tshwanang le sone gape. ⁷ Mme ntša ga e kitla e lenyetsa ope wa bomorwa Iseraele loleme, go simolola ka motho go fitlha ka phologolo; gore lo tle lo itse gore Jehofa o kgona go dira pharologanyo fa gare ga Baegepeto le bomorwa Iseraele.’ ⁸ Mme batlhanka bano botlhe ba gago ba tla tla kwa go nna ba bo ba obama fa go nna, ba re, ‘Tsamaya, wena le batho botlhe ba ba late-lang dikgato tsa gago.’ Mme morago ga moo ke tla tswa.” Foo a tswa fa go Faro a tuka bogale.

it-2-E 436 ¶4
Moshe

Go ne go tlhokega tumelo le bopelokgale go ema fa pela ga ga Faro. Moshe le Arone ba ne ba ka kgona go diragatsa kabelo ya bone fela ka thuso ya ga Jehofa le moya o o boitshepo. Aka-nya ka kgotlatshekelo ya ga Faro, kgosi e e neng e le maatla go gaisa dikgosi tsotlhe ka nako eo.

Ba ne ba eme fa pele ga ga Faro yo o neng a itseela kwa godimo, a galalediwa go feta batho botlhe e bile batho ba mo tsaya e le modimo, a na le bagakolodi, balaodi ba sesole, batlhokomedile le makgoba a gagwe. Mo godimo ga moo, mo bathong ba ba neng ba le kगतलhanong le Moshe go ne go na le batho ba ba maatla, baetedipele ba bodumedi, le bapersiti ba ba neng ba dira maselamose. Kwantle ga ga Faro, banna bano e ne e le bone fela ba ba neng ba na le maatla go gaisa batho botlhe kwa Egepeto. E re ka banna bano ba ne ba dumela mo medimong ya Egepeto, ba ne ba ema Faro nokeng. Moshe le Arone ba ile ba ya kwa go Faro makgetlo a le mantsi mme pelo ya ga Faro e ile ya thatafalela go ya pele ka gonne o ne a sa batle go golola masole a a neng a le kwa tlase ga taolo ya gagwe. Morago ga gore Moshe le Arone ba bolelele Faro ka petso ya bo 8, ba ile ba lelekiwa fa pele ga gagwe mme ba ile ba tshosediswa ka gore ba tla bolawa fa ba ka leka go ikopanya le ene gape.—Ek 10:11, 28.

Go Ribolola Matlotlo mo Dikwalong

(Ekesodo 10:1, 2) Foo Jehofa a raya Moshe a re: “Tsena kwa go Faro, ka gonne nna—ke letlile pelo ya gagwe le dipelo tsa batlhanka ba gagwe gore di nne logwadi, gore ke beye ditshupo tseno tsa me fela fa pele ga gagwe, ² le gore o tle o bolele mo ditsebeng tsa ga morwao le tsa ga morwa morwao kafa ke dirisaneng le Egepeto ka bosetlhogo ka gone le ditshupo tsa me tse ke di tlisitseng mo gare ga bone; mme ruri lo tla itse gore ke nna Jehofa.”

w95 9/1 11 ¶11

Basupi Kगतलhanong le Medimo ya Maaka

¹¹ Fa Baiseraele ba ne ba santse ba le kwa Egepeto, Jehofa o ne a romela Moshe kwa go Faro mme a re: “Tsena kwa go Faro, gonne ke thatafaditse pelo ya gagwe le pelo tsa batlhanka ba gagwe gore ke tle ke bonatse ditshupo tse tsa me mo gare ga bone, le gore wena o tle o bolele mo ditsebeng tsa ga morwao, le tsa ga morwa

morwao dilo tse ke di diretseng Egepeto, le ditshupo tsa me tse ke di dirileng mo gare ga bone, gore lo itse fa ke le Jehofa.” (Ekesodo 10:1, 2) Baiseraele ba ba kutlo ba ne ba tla bolelela bana ba bone ka ditiro tse di maatla tsa ga Jehofa. Bana ba bone le bone ba ne ba tla bolelela bana ba bone, go bo go tswelala fela jalo, go tloga kokomaneng e nngwe go ya kwa go e nngwe. Ka jalo, ditiro tsa ga Jehofa tse dikgolo di ne di tla gakologelwa. Gompiono le gone fela jalo, batsadi ba na le boikarabelo jwa go neela bana ba bone bo-supi.—Duteronomo 6:4-7; Diane 22:6.

(Ekesodo 11:7) Mme ntša ga e kitla e lelenyetsa ope wa bomorwa Iseraele loleme, go simolola ka motho go fitlha ka phologolo; gore lo tle lo itse gore Jehofa o kgona go dira pharologanyo fa gare ga Baegepeto le bomorwa Iseraele.’

it-1-E 783 ¶15

Ekesodo

Jehofa o ile a bontsha maatla a gagwe le go galeletsa leina la gagwe fa a ne a golola Baiseraele kwa Egepeto. Fa ba le kwa lotshitshing lwa Lewatle le Lehibidu, Moshe le Baiseraele ba ile ba simolola go opela mme Miriame moporofeti wa mosadi, a tsaya moropana ka seatla mme basadi botlhe ba simolola go tswa ka meropana ba bina. (Ek 15:1, 20, 21) Baiseraele ba ile ba kgaoganya gotlhelele le baba ba bone kwa Egepeto. Fa Baiseraele ba ne ba tswa kwa Egepeto go ne go se kitla go nna le phologolo kgotsa motho ope yo o neng a tla ba utlwiswa botlhoko; le ntša e ne e se kitla e bogola ope wa bomorwa Iseraele. (Ek 11:7) Le fa gone buka ya Ekesodo e sa tlhalose gore Faro le masole a gagwe ba ile ba tsena mo lewatlang, Pesalema 136:15 e a re Jehofa o ile a “tlhotlhorela Faro le mophato wa gagwe wa sesole mo Lewatlang le Lehibidu.”

Mmalo wa Baebele

(Ekesodo 10:1-15) Foo Jehofa a raya Moshe a re: “Tsena kwa go Faro, ka gonne nna—ke letlile pelo ya gagwe le dipelo tsa ba-

tlhanka ba gagwe gore di nne logwadi, gore ke beye ditshupo tseno tsa me fela fa pele ga gagwe, ² le gore o tle o bolele mo ditse-beng tsa ga morwao le tsa ga morwa morwao kafa ke dirisaneng le Egepeto ka bosetlhogo ka gone le ditshupo tsa me tse ke di tlisi-tseng mo gare ga bone; mme ruri lo tla itse gore ke nna Jehofa.” ³ Ka jalo Moshe le Arone ba tsena kwa go Faro mme ba mo raya ba re: “Jehofa Modimo wa Bahebera o buile jaa-na, ‘O tla gana go inkobela ka lobaka lo lo kae? Lesa batho ba me ba tsamaye gore ba tle ba ntirele. ⁴ Gonne fa o nna o gana go lesa batho ba me ba tsamaya, bona, ke tlisa tsie mo teng ga meelwane ya gago ka moso. ⁵ Mme e tla bipa bogodimo jo bo bonalang jwa lefatshe mme ga go kitla go kgonega go bona lefatshe; mme e tla ja mo gongwe gotlhe mo go falotseng, mo lo go tlogeletsweng ke sefako, ruri e tla ja setlhare sengwe le sengwe sa lona se se tlhogang e se tlosa mo nageng. ⁶ Mme matlo a gago le matlo a batlhanka ba gago botlhe le matlo a Egepeto yotlhe a tla tlala ka selekanyo se borraalona le borre ba borraalona ba iseng ba ko ba se bone go tloga ka letsatsi le ba simolotseng go nna gone ka lone mo lefatsheng go fitlha mo letsatsing leno.’” Foo a retologa a tswa fa go Faro. ⁷ Morago ga moo batlhanka ba ga Faro ba mo raya ba re: “Monna yono o tla nna seru mo go rona ka lobaka lo lo kae? Lesa batho bano ba tsamaye gore ba tle ba direle Jehofa Modimo wa bone. A le jaanong ga o itse gore Egepeto e nyeletse?” ⁸ Ka jalo Moshe le Arone ba busediwa kwa go Faro, mme a ba raya a re: “Tsamayang lo direle Jehofa Modimo wa lona. Ke bomang ba tota ba tsamayang?” ⁹ Foo Moshe a re: “Re tla tsamaya le basha ba rona le batsofe ba rona. Re tla tsamaya le bomorwaarona le bomorwadiarona, le dinku tsa rona le dikgomo tsa rona, gonne re tshwanetse go direla Jehofa mole-tlo.” ¹⁰ Mme ene a ba raya a re: “A go nne

jalo, gore Jehofa o na le lona fa ke tla bo ke lo lesa lo tsamaya lona le bana ba lona ba bannye! Bona, go farologana le seno, lo ikaeletse go dira sengwe se se bosula. ¹¹ A go se nne jalo! Tsamayang, tsweetswee, lona ba lo leng banna ba ba nonofileng, mme lo direle Jehofa, ka gonne ke sone se lo batlang go se dira.” Foo ba lelekwa fa pele ga ga Faro. ¹² Jaanong Jehofa a raya Moshe a re: “Otlolela seatla sa gago mo godimo ga lefatshe la Egepeto gore tsie e tle mo lefatsheng la Egepeto mme e je dimela tsotlhe tsa lefatshe, sengwe le sengwe se se tlogetsweng ke sefako.” ¹³ Moshe a akofa a otlolela thobane ya gagwe mo godimo ga lefatshe la Egepeto, mme Jehofa a dira gore phefo ya botlhaba e foke mo lefatsheng mo letsatsing leo lotlhe le bosigo jotlhe. Ga nna moso mme phefo ya botlhaba ya bo e tshotse tsie. ¹⁴ Tsie ya tla mo godimo ga lefatshe lotlhe la Egepeto ya ba ya nna mo karolong yotlhe ya naga ya Egepeto. E ne e le bokete tota. Pele ga yone go ne go ise go ke go nne le tsie ka tsela eno jaaka yone, e bile ga go kitla go nna le epe ka tsela eno morago ga yone. ¹⁵ Ya bipa bogodimo jo bo bonalang jwa lefatshe lotlhe, mme lefatshe la nna lefifi; mme ya ja dimela tsotlhe tsa lefatshe le maungo otlhe a ditlhare a a neng a tlogetswe ke sefako; mme go ne go sa sala sepe se se tala mo ditlhareng kgotsa mo dimeleng tsa naga mo lefatsheng lotlhe la Egepeto.

JULY 27–AUGUST 2

MATLOTLO A A MO LEFOKONG LA MODIMO | EKESODO 12

“Tlologanyo e Kaya Eng mo Bakereseteng”

(Ekesodo 12:5-7) Nku ya lona e tshwanetse ya bo e itekanetse sentle, e le e tonanyana, e na le ngwaga o le mongwe. Lo ka nna lwa e tsaya mo diphelefung tse dipotlana kgotsa mo dipoding. ⁶ Mme lo nne lo e dibetse go

fitlha mo letsatsing la bolesome le bonè la kgwedi eno, mme phuthago yotlhe ya kopano ya Iseraele e e tlhabe fa gare ga maitseboa a mabedi. ⁷ Mme ba tseye mangwe a madi ba a gase mo mephakwaneng e mebedi le mo karolong e e fa godimo ya kgoro ya matlo a ba tla e jelang mo go one.

w07 1/1 20 ¶4

“O Ipele Fela Thata”

⁴ Jesu o ile a swa ka Nisane 14, 33 C.E. Kwa Iseraele, Nisane 14 e ne e le letsatsi le le itumedisang la mokete wa Tlologanyo. Ngwaga le ngwaga mo letsatsing leo, malapa a ne a ja dijo tse di neng di akaretsa kwana e e se nang bogole. Ka tsela eno, ba ne ba ikgopotsa seabe se madi a kwana a nnileng le sone mo go namoleng maitibolo a Baiseraele fa moengele a ne a bolaya maitibolo a Baegepeto ka Nisane 14, ka ngwaga wa 1513 B.C.E. (Ekesodo 12:1-14) Kwana eo ya Tlologanyo e ne e tshwantshetsa Jesu, yo moaposetoloi Paulo a ileng a bua jaana ka ene: “Keresete tlologanyo ya rona o ntshitswe setlhabelo.” (1 Bakorintha 5:7) Fela jaaka madi a kwana ya Tlologanyo, madi a a tsholotsweng a ga Jesu a thusa batho ba le bontsi go bona poloko.—Johane 3:16, 36.

(Ekesodo 12:12, 13) Mme ke tla ralala lefatshe la Egepeto mo bosigong jono ke itaya leitibolo lengwe le lengwe mo lefatsheng la Egepeto, go simolola ka motho go fitlha ka phologolo; mme ke tla diragatsa katlholo mo medimong yotlhe ya Egepeto. Ke nna Jehofa. ¹³ Mme madi a tla nna sesupo sa lona mo matlong a lo leng mo go one; ke tla bona madi mme ke bo ke feta mo godimo ga lona, mme sebetso ga se kitla se tla mo go lona e le tshenyo fa ke itaya lefatshe la Egepeto.

it-2-E 583 ¶6

Tlologanyo

Jesu o ile a diragatsa dilo dingwe tse di neng di dirwa ka Tlologanyo. Ka sekai, go ile ga kgatshiwa madi mo matlong kwa Egepeto e le gore maitibolo

a se ka a senngwa ke moengele. Paulo o tthalosa Bakeresete ba ba tloditsweng e le phuthago ya maitibolo (Bah 12:23), gape o tthalosa Keresete e le morekolodi wa bone yo o ba golotseng ka madi a gagwe. (1Bath 1:10; Bae 1:7) Ka tloaganyo go ne go sa robiwe marapo a kwana ya tloaganyo. Boporofeti bo bontsha gore marapo a ga Jesu a ne a se kitla a robiwa mme seo se ile sa diragadiwa ka loso lwa ga Jesu. (Pes 34:20; Joh 19:36) Ka jalo, Bajuda ba ile ba tswelala ka go keteka moletlo wa Tloaganyo e bile Molao o ile wa ba bontsha dilo tse di neng di tla diragala mo isagweng le gore Jesu Keresete ke “Kwana ya Modimo.” —Bah 10:1; Joh 1:29.

(Ekesodo 12:24-27) “Mme lo boloke selo seno e le molao mo go lona le mo go bomorwaalona ka bosakhutleng. ²⁵ Mme go tla diragala gore fa lo tla mo lefatsheng le Jehofa a tla le lo nayang, fela jaaka a boletse, lo boloke tirelo eno. ²⁶ Mme go tla diragala gore fa bomorwaalona ba lo raya ba re, ‘Tirelo eno e kaya eng mo go lona?’ ²⁷ lo re, ‘Ke setlhabelo sa tloaganyo se se direlwang Jehofa, yo o neng a tlola matlo a bomorwa lseraele kwa Egepeto fa a ne a leretse Baegepeto sebetso, mme o ne a golola matlo a rona.’” Foo batho ba ikoba ba obama.

w13 12/15 20 ¶13-14

‘Seno e Tla Nna Segopotso go go Lona’

¹³ Fa dikokomana tse disha di ntse di gola, batsadi ba ne ba tla ruta bana ba bone dithuto tse di botlhokwa malebana le Tloaganyo. Nngwe ya dithuto tseo e ne e le gore Jehofa a ka sireletsa baobamedi ba gagwe. Bana ba ne ba ithuta gore Jehofa ga se Modimo yo o sa tthaloganyesegeng, yo e seng wa mmatota. Jehofa ke Modimo wa mmatota, yo o tshelang, yo o kgatlhegelang batho ba gagwe le yo o ba sireletsang. O ne a bontsha seo ka nako ya fa a ne a sireletsa maitibolo a Baiseraele, “fa a ne a itaya Baegepeto ka dipetso.” O ne a boloka maitibolo a Baiseraele a tshela.

¹⁴ Gompieno batsadi ba Bakeresete ga ba a laelwa gore ngwaga le ngwaga ba bolelele bana ba bone gore Tloaganyo e ne e kaya eng. Le fa go ntse jalo, a o ruta bana ba gago thuto e e tshwanang le eo, ya gore Modimo o sireletsa batho ba gagwe? A o ba bolelele gore o tlhatswegile pelo ka botlalo gore Jehofa e sa ntse e le Mosireletsi wa batho ba gagwe. (Pes. 27:11; Isa. 12:2) Mme gape, a o ruta bana ba gago jalo ka go tlotla le bone ka tsela e e lorato le e e itumedisang? Dira maiteko a go tlotla le bone ka kgang eno gore o tlhotlheletse lelapa la gago gore le gole semoyeng.

Go Ribolola Matlotlo mo Dikwalong

(Ekesodo 12:12) Mme ke tla ralala lefatshe la Egepeto mo bosigong jono ke itaya leitibolo lengwe le lengwe mo lefatsheng la Egepeto, go simolola ka motho go fitlha ka phologolo; mme ke tla diragatsa katlholo mo medimong yotlhe ya Egepeto. Ke nna Jehofa.

it-2-E 582 ¶2

Tloaganyo

Dipetso Tse di Lesome tse di wetseng Egepeto e ne e le kotlhao kgatlhanong le medimo ya Baegepeto, segolobogolo petso ya bolesome, go bolawa ga maitibolo. (Ek 12:12) Phelefu (nku e e tonanyana) e ne e le boitshepo mo modimong yo o bidiwang Ra, ka jalo, fa go ne go kgatshiwa madi a kwana ya Tloaganyo mo kgorong Baegepeto ba ne ba tsaya seno e le tlontlololo. Gape, Baegepeto ba ne ba tsaya poo e le boitshepo, ka jalo go bolawa ga maitibolo a dipoo e ne e le kotlhao mo modimong yo o bidiwang Osiris. Batho ba ne ba tsaya Faro jaaka morwa wa ga Ra. Loso lwa leitibolo la ga Faro lo ne lo tla bontsha gore Ra le Faro ga ba na maatla.

(Ekesodo 12:14-16) “‘Mme letsatsi leno e tla nna segopotso mo go lona, lo le keteke go nna moletlo wa ga Jehofa go ya le dikokomana tsotlhe tsa lona. Lo le keteke e le molao ka bosakhutleng. ¹⁵ Lo je dikuku tse di sa

bedisiwang malatsi a le supa. Ee, mo letsa-
tsing la ntlha lo tlose sebediso mo matlong a
lona, ka gonne ope fela yo o jang se se be-
disitsweng, go simolola mo letsatsing la ntlha
go fitlha ka la bosupa, moya oo o kgaolwe
mo Iseraele. ¹⁶ Mme mo letsatsing la ntlha lo
tla nna le kopano e e boitshepo, le mo letsa-
tsing la bosupa kopano e e boitshepo. Go se
ka ga dirwa tiro epe mo malatsing ao. Se fela
moya mongwe le mongwe o tlhokang go se
ja, lo ka nna lwa direlwa seo se le sosi.

it-1-E 504 ¶1

Kopano

Sengwe se se neng se tshwana ka “dikopano tse
di boitshepo” ke gore batho ba ne ba sa dire
ditiro tsa boitshediso ka nako eo. Ka sekai, ka
Moletlo wa Dikuku Tse di sa Bedisiwang letsatsi la
ntlha le la bosupa e ne e le nako ya “dikopano tse
di boitshepo,” ke ka moo Jehofa o ileng a re: “Go
se ka ga dirwa tiro epe mo malatsing ao. Se fela
moya mongwe le mongwe o tlhokang go se ja, lo
ka nna lwa direlwa seo se le sosi.” (Ek 12:15, 16)
Le fa go ntse jalo, ka nako ya “dikopano tse di
boitshepo” baperesiti ba ne ba ntshetsa Jehofa
ditlhabelo (Lef 23:37, 38), ka jalo, go ne go se
phoso go dira ditiro dingwe tsa letsatsi le letsa-
tsi. Mme gone nako eno e ne e se nako ya gore
batho ba nne fela ba sa dire sepe, ba ne ba
tshwanetse go e dirisetsa go ithuta ka Jehofa. Ka
letsatsi leo, batho ba ne ba kopana mmogo go
obamela Jehofa le go rutiwa ka Ene. Ba ne ba
kgothadiwa ke go utlwa Lefoko la Modimo le ba-
lwa e bile le tlhalosiwa phatlhalatsa jaaka go ne
go dirwa moragonyana kwa sinagogeng. (Dit 15:
21) Le fa gone batho ba ne ba sa dire ditiro tsa
boitshediso ka letsatsi la Sabata kgotsa ka “diko-
pano tse di boitshepo,” ba ne ba dirisa nako eo
go rapela, go tlhatlhanya ka Mmopi le ka maikae-
lelo a gagwe.

Mmalo wa Baebele

(Ekesodo 12:1-20) Jaanong Jehofa a raya
Moshe le Arone mo lefatsheng la Egepeto a

re: ² “Kgweri eno e tla nna tshimologo ya di-
kgweri mo go lona. E tla bo e le ya ntlha ya
dikgwedi tsa ngwaga mo go lona. ³ Buang le
phuthago yotlhe ya Iseraele, lo re, ‘Mo letsa-
tsing la bolesome la kgweri eno ba itseele
mongwe le mongwe nku ya ntlo ya bagologo-
lwane, ntlo nngwe le nngwe e nne le nku e
le nngwe. ⁴ Mme fa ba ntlo ba le babotlana
thata go ka fetsa nku, foo ene le moagelani
wa gagwe yo o bapileng le ene ba e tsee-
le mo ntlong ya gagwe kafa palong ya meya;
lo lekanyetse mongwe le mongwe go ya kafa
a jang ka gone malebana le nku. ⁵ Nku ya
lona e tshwanetse ya bo e itekanetse sentle,
e le e tonanyana, e na le ngwaga o le mo-
ngwe. Lo ka nna lwa e tsaya mo diphelelung
tse dipotlana kgotsa mo dipoding. ⁶ Mme lo
nne lo e dibetse go fitlha mo letsatsing la bo-
lesome le bonè la kgweri eno, mme phuthago
yotlhe ya kopano ya Iseraele e e tlhabe fa
gare ga maitseboa a mabedi. ⁷ Mme ba tseye
mangwe a madi ba a gase mo mephakwa-
neng e mebedi le mo karolong e e fa godimo
ya kgoro ya matlo a ba tla e jelang mo go
one. ⁸ “‘Mme ba je nama mo bosigong jono.
Ba e je e besitswe ka molelo le dikuku tse
di sa bedisiwang mmogo le merogo e e ga-
lakang. ⁹ Lo se ka lwa ja epe ya yone e le
tala kgotsa e bedisitswe, e apeilwe ka me-
tsi, mme besang tlhago ya yone mmogo le
memo ya yone le mateng a yone mo molelong.
¹⁰ Mme lo se ka lwa sadisa sepe sa yone go
fitlha mo mosong, mme sepe sa yone se se
salang go fitlha mo mosong lo se fise ka mo-
lelo. ¹¹ Mme lo e je ka tsela eno, dinōka tsa
lona di gatlhilwe, lo rwele bompaatšhane mo
dinaong mme lo tshotse lore lwa lona ka sea-
tla; lo e je ka potlako. Ke tloaganyo ya ga
Jehofa. ¹² Mme ke tla ralala lefatsheng la Egepe-
to mo bosigong jono ke itaya leitibolo lengwe
le lengwe mo lefatsheng la Egepeto, go simo-
lola ka motho go fitlha ka phologolo; mme ke

tla diragatsa katlholo mo medimong yotlhe ya Egepeto. Ke nna Jehofa. ¹³ Mme madi a tla nna sesupo sa lona mo matlong a lo leng mo go one; ke tla bona madi mme ke bo ke feta mo godimo ga lona, mme sebetso ga se ki-tla se tla mo go lona e le tshenyo fa ke itaya lefatshe la Egepeto. ¹⁴ “‘Mme letsatsi leno e tla nna segopotso mo go lona, lo le keteke go nna moletlo wa ga Jehofa go ya le dikokomana tsotlhe tsa lona. Lo le keteke e le molao ka bosakhutleng. ¹⁵ Lo je dikuku tse di sa bedisiwang malatsi a le supa. Ee, mo letsatsing la ntlha lo tlose sebediso mo matlong a lona, ka gonne ope fela yo o jang se se bedisitsweng, go simolola mo letsatsing la ntlha go fitlha ka la bosupa, moya oo o kgaolwe mo lseraele. ¹⁶ Mme mo letsatsing la ntlha lo tla nna le kopano e e boitshepo, le mo letsatsing la bosupa kopano e e boitshepo. Go se ka ga di-rwa tiro epe mo malatsing ao. Se fela moya mongwe le mongwe o tlhokang go se ja, lo ka nna lwa direlwa seo se le sosi. ¹⁷ “‘Mme lo boloke moletlo wa dikuku tse di sa bedisiwang, ka gonne mo go lone letsatsi leno ke tla ntsha masomosomo a lona mo lefatsheng la Egepeto. Mme lo boloke letsatsi leno go ya le dikokomana tsa lona e le molao ka bosakhutleng. ¹⁸ Mo kgweding ya ntlha, mo letsatsing la bolesome le bonè la kgwedi, mo maitseboeng lo je dikuku tse di sa bedisiwang go fitlha mo letsatsing la bomasome a mabedi le bongwe la kgwedi mo maitseboeng. ¹⁹ Go se ka ga fitlhelwa sebediso malatsi a le supa mo matlong a lona, ka gonne ope fela yo o lekang se se bedisitsweng, e ka ne e le moagi wa moeng kgotsa motho wa mo lefatsheng leo, moya oo o kgaolwe mo phuthegong ya lseraele. ²⁰ Lo se ka lwa ja sepe se se bedisitsweng. Lo je dikuku tse di sa bedisiwang mo mannong otlhe a lona.’”